



Kerwespruch 1988

Ehr liebe Leit, es ess so weit,
in Worfelle ess wirrer Kerwezeit.
Woanns iwverall noch Qwetschekuche rischt,
un hoch die Sunn vum Himmel schtischt.
Ob Derr un Dick, ob Groß un Kloa,
woanns goanze Ort ess uff de Boah,
do wern zwaa fedde Sai geschloacht
un oaschließend zu Woascht gemoacht.
Werd doann de Saimoue noch oogeschnerre,
do soin mer wie vum Watz gerere;
Zum Noochdisch gibts Rosinezopp,
doann schtelle meßs goanze Ort uff de Kopp.
Do feiern mer rischdisch un soin froh
un singe: „DIE WORFELLER KERB ESSLEDO“

Woas im Ort so ess bassiert,
honn mer im Kerweschbruch nodiert!

Daß de alde Leit de Woi gut schmeckt,
dess honn mer oan de letzt Kerb gemerkt.
Do honn e paar Alde beisoamme gehockt,
un gewaldisch oaner gezockt.
De oa verzeht wie er im Kriesch hot gerunge,
die Oanneren honn „Fern bei Sedan“ gesunge
un als honnse wirrer ehr Gläser vollgeschenkt,
do hot noch loang koaner oans Hoamgeh geönt.
Aa doann net als de nächste Humbe ess kumme
den hoat de erste glei in die Hoand genumme,
schteit uff un trinkt wie woanns soin letzte wär,
noch Fünf große Schluck un de Humbe ess leer.
Do verlässt en uff oamol soi jugendlich Kraft,
uff de Jack un die Hose trebbelt de Saft.
„Ei Kerl, du doch loangsoam“ dunn die Leit all ruffe,
do schluckt der ersträscht, der läst sisch net bluffe.
Ess letzte Maul voll horrer net gepackt,
un oa Hoar werer unnern Disch gesackt.
Do horrer gesoat, daß er hoam geh wollt,
doann honn sen hinnerm Disch eraus gehollt.
Mit Boah die wärscher wie Kaugummi warn,
wollt der mit soim Fahrroad in die Kiehgass noch fahrn.
Schnell honnsem es Road oabgeschlosse,
eeh der werklisch macht so Bosse.
Wo ess er doann jetzt, mer sejen net meh,
Helft uns mol suche, wo ess er bloß heh.
Oans Schitzewerts ehrne Trebbheert mers noch lalle,
zu schbeet, er ess doasch die Hausdeer gefalle.
Die frisch gebutzt Hausdeer, woas hatt die enn gloanz,
die Gloasscheib die war aa net meh goanz.
Leischeblass do leirer jetzt,
do honn mern erst e mol he gesetzt
un hon en gefreegt: „Dut irgendwoas weh?“,
do horrer bloß gesoat: „Woas wars Frieher so schee“.
Unn weils Frieher so schee als war,
Schbeelt die Musigg fern Raaße Philipp de „Treue Husar“

„ES WAR EINMAL EIN TREUER HUSAR, DER LIEBT“.....“

Fer de 50. Geburtsdoag hot mer meist koan Platz im Haus,
also geht mer zum feiern goanz oafach in de Hof enaus.
Oam Doag devor werd e Zelt uffgeschstellt,
Brotwerscht, Bier, Disch un Bänk beschtellt.
Beim Eelemiller denn se sisch Roll un Bulldogg holle,
wo se des Gescherr beim Körner doann holle wolle.
Zu zweit warn se, do soin mer uns oanisch,
oft soin se goanz schlau, - moan isch.
Doch in dem Fall honn se sisch selbst iwertroffe,
mer kennt fast moane die warn schon besoffe.
Die honn sisch vielleischt oageschtellt,
die soin dorum wie die erste Mensche uff de Welt.
Ehr lieve Leit woas war des e Zucht,
bis die den Kiehlschroank hatte uff die Roll gewucht.
Die zwaa warn geschwitzt un trebbel Sasch nass,
so soin se doann oakumme in de Eelegass.
Zum Oabloare hon se de Harald gehollt,
der hot gesoat: „Isch meescht wisse woas ehr wollt,
der Kiehlschroank, ei der ess doch nett schwer,
den troag isch alloa woann er Hoandlicher wär“!
De Rischard mault: „Klobb´ so koa Schbrisch,
nemm du doch de Kiehlschroank, mer nemme die Disch“.
Do denkt sisch der Harald, des koan doch net soi
un guggt so aus Schbass in des Kiehlschränksche noi.
„Ei woas ess doann des um alles in de Welt,
wer hot doann do e Fass enoigeschtellt?“
De Rischard hot mit de Schultern gezuckt,
un hot selbst in den Kiehlschroank enoigeguggt.
Do schteht e Fässje mit 50 Liter,
des war fer de Rischard goanz schee bitter.

Woann ehr mol woas hewe wollt wie e Biefass so schwer,
do iwwerlegt erst garnet noch loang he un her.
Isch waas jetzt Zwaa die wo des gut kenne,
ehr misst eisch nur oan de Lutze Rischard wenne.
Die Musigg schbeelt mit Gottes Segen,
„Prost, Prost Kamerad wir woll´n noch einen heben“
„PROST, PROST KAMERAD, PROST, PROST KAMERAD“

Im Alder woann oam so veeles dut weh,
do segt mer oft: „Mer ess es net schee“.
In de Zeitung do schteht doann: „Nemmt Pille un Salbe“
un Owendes vorm Schloofe do trinkt noch en Halwe.
Es gibt Scharlatoane un aa Wunderheiler,
die gäwwe oam Pille, da werd mer nur noch geiler.
Do hot mer Schmerze in Mark un Boah,
do rore doe oam: „Ei schbring doch in de Moa (Main)“.
Woas will mer mache in dere Not,
woann selbst de Dokter was koan Rot.
Die Fraa um die´s im Kerweschbruch geht,
die ess werklisch gar net bleed,
Sie hot Schmerze in ehrne Owwerschenkel
un geht oan die Schbortdasch vun ehre Enkel.
Die Dasch schteht immer im selwe Eck,
oan Griff un die Salb war weg.

Sie reibt ehr Owwerschenkel oi noch dort,
uff oamol warn die Schmerze fort.
Vorgestern noch hot se net gekennt,
jetzt ess se zu ehrrm Enkelsche gerennt.
Sie fiehlt sisch jetzt wie e jung Kalb
un wollt sisch bedoanke fer die Salb.
Es Enkelsche Thomas konns net verschteh:
„Ei Oma die Salb die ess fer die Zeh
orrer bist du werklisch so bleed,
in dere Tub ess Blend - a - med“!
Isch glaab des Doanke schee ging in die Hose,
doch die Schmerze warn wie fortgebloose.
Ehr liewe Leit des war koan Witz
un bassiert ess des in de Gaase-Schbitz.

Es Fußballknoblaachfest in dem Summer,
des war beschtimmt e goanz groß Nummer.
Doch wie so oft oan dene Feste,
gibt's a moanschesmol paar Reste.
Vun Werschtscher un Bier war net meh veel do,
dodefear schtoand e herrnlos Fahrroad nääwerm Klo.
Die Noachtwach' vum Zelt dess warn koa dumme,
honn se doch des Fahrroad als Taxi genumme.
Do soin se mit hoam un honn Schloofseck gehollt,
des Road des ess die goanz Noacht nur gerollt.
Oam neechste moiend war Zeltoabbau,
do dutt jeder helfe, ob Moann orer Frau.
Die Aoweit ess gedoh mer hot wirrer Doascht
un werd glei mit Bier un mit Brotworscht versorscht.
Do segt de Kiehgässer zum Eelschloambessscheisch:
„Kumm mer mache mol en kloane Schtreisch,
des Fahrroad des do leit goanz flach
schtelle mer uff em Birgerhaus soi Dach“.
Zwaa Männer e Wort, gesoat - gedoh
un schon foange se mim nuffklerrern o.
Uff de Schoanst honn ses geschteilt,
so daß es jeder sei je koannt uff dere Welt.
Die honn sisch vor lache es Zwerschfell fast verrenkt,
awwer oan woas beeses hot koaner gedenkt.
Do kimmt de Vadder vun dem Bub dem des Road geheert,
der hot se beim lache goanz schee geschteert.
De Bub kriggts vum Vadder dehoam doann gesoat,
do werds dem Oangst un Boang um soi Road.
Er beschweert sisch glei bei de rischdische Leit:
„Holt mer moi Fahrroad runner - awwer noch heit“!
Die zwaa Kloowe die honn sisch werklisch geeilt
un honn em soi Fahrräadsche oabgeseilt.
Ja, woas lernt mer aus so em kloane Krach:
„Schtellt nie de oannern ehr Räder uff're Dach“!
De Bub ess glicklich un de Babba ess froh;
Die Musigg schbeelt: „Ja, mer soin mim Rad'l do“.

„JA, MER SOIN MIM RAD'L DO, JA, MER SOIN"

Isch soag's eisch wierers net mache sollt,
woann ehr noch Geere Schtroh bringe wollt.

Vun de Eelegass aus mit Eloan,
hott en Worfeller Bauer Schtroh vortgefahrn.
Vun Kloa - Geere doann in aller Ruh,
fehrt er uff de Eisbohnewel zu.
Die Schroanke gehn runner es ess net geloue,
do ess der Bauer schnell oabgeboue,
um net zu waade vorm Geerer Gleis,
doch die Oabkerzung die hatt ehrn Preis.
Er hott sisch gedenkt: „Isch soin koan dumme,
isch kennt vun Biddelborn aus kumme.
Schtatt waade uff en Zug aus Lorsch,
fahr isch goanz oafach drunner doasch“.
Ach du lieber Gott, oh je,
loangt zum Doaschfahrn doann die Heh.
Er guggt, es loangt, des macht em Schbass
un triet geheerisch uff soi Gas,
um unner rer Latt doaschzufahrn goanz leischt,
Die ehm die Doaschfahrtsheh oazeischt.
Der Bauer oan nix beeses denkt,
gemäschlich nur soin Bulldogg lenkt.
Do dutts en Ruck un doan goanz leise,
dunn alle Boose runnerschmeise,
dess war die Latt' die Gottverflucht,
die er vorhien noch hot gesucht.
Do driuwe uff de oannern Seit,
do ess de Oabschtoand bissje weit,
daß mer goanz leischt die Latt verfehlt,
woann mer sisch e Oabkerzung wählt.
Drum soag isch unserm Herbert Engel:
„Waad lieber bissje vor de Bengel,
daß du koan Fehler mache dust,
un zwaamol Schtroh uffloare muß“.

Es 100jährische vun de TSG war goanz schee famos,
do war jeden Doag de Deiwel los.
Ess Zelt war immer geroammelde voll,
gesoffe honn se Bier wie doll.
Oam Mondoag schließlich beim Friehschobbe doann,
do horrer gezeischt woas er werklisch koann
un lässt oandauernd die Sektflasche knalle,
uff oamol heert mern nur noch lalle.
Er koann alloa schon net meh brunse geh
un iwwerhaabt es war schon net meh schee.
So ess es bassiert, do horrer geleije,
er dut sisch uff oamol gar net meh reje,
do hon se es Rore Kreiz gehollt,
die kumme aa glei mim Audo oagerollt
un effne schnell die Audodeer,
woas war der Kerl beim troue so schwer.
Er leit doann im Audo wie geschosse
un hot noch e paar beese Ferz gelosse.

Als se doann in de Rhoischroß loande,
geht dene doch der Kerl oabhoande.
Er schteit nämlich aus un rennt glei weg,
Eugeholt hon sen oan de neechst Eck.
Er wollt net hoam, sein Doascht hott sisch wirrer gemeld,
„Losst misch geh, isch muß zurick ins Zelt“!
Dort oagekumme dut er e Bier glei trinke
un zum Oabschied em Rore Kreizaudo winke.
Des koann doch net wohr soi, des gibts doch net,
awwer wie gesoat - Ukraut vergeht halt net.
Wem des bassiert ess, dess werd net verore,
mit dem Schpruch honn mer dem schon genunk iwwegeprore.
De Musigger schbeelt, nemmts em net fer krumm:
„Bier her, Bier her, orer isch fall um“

„BIER HER, BIER HER, ODER ISCH FALL UM JUCHHE"

+ + + + +

Zum Schluß noch woas in eigener Sache,
fer all die gern trinke un aa gern lache.
Mer honn en Veroin, do misst ehr debei,
dess es nix fer jeden dess soag isch eisch glei.
Woas wolle mer mit Schlääscher un oannern Bosse,
bei uns werd nur die Wutz erausgelosse.
Mer wolle erhalde woas mer vun de Alde iwvernumme,
un woann uns aa die Kepp moijends brumme.
So ehr Buwe ehr wisst jetzt bescheid,
ehr hett zum iwwerleje bis neext Jahr noch Zeit.
Wer doann noch net waas ob er will orrer net,
der bleibt oam beste oan Kerb in soim Bett.

Isch merk groad ääwe die Käähel werd mer wund,
doch do gehts bei uns erst rischdisch jetzt rund.
Mer doanze unn singe bis de Soal soammekracht,
der Woi schmeckt so gut un de Schitzewert lacht.
Isch load eisch all goanz Herzlich oi,
nur oamol im Jahr gibts Kerwewoi.
Bei Hausmacher Worscht, Haxe un Schinge,
do wern mer noch so moansch Fläschje trinke.
So jung wie mer heit sein, kumme mer net meh soamme,
de Baaber der schnappt sisch zum doanze soi Momme.
Un jeder singt mit jetzt un ess rischdisch froh:
„Die Worfeller Kerb ess wirrer do“!

„DIE WORFELLER KERB, DIE WORFELLER KERB, DIE WORFELLER KERB ESS DO“!

Wo isst und trinkt man gut?

„Im Schützenhof“

Unterdorf 28

Worfelden

Unterdorf 28

Besitzer Joh. Klink VI.

HAARSCHNEIDEN • RASIEREN
BUBIKOPFSCHNEIDEN

EMPFIEHLT SICH

WALTER GERBIG

Gasthaus „Zur Krone“ Worfelden

Gutgepflegte Biere der Brauerei Binding

Reine Weine — Prima Apfelwein

Vorzügliche Küche — Spezialität: Hausmacher Wurst

Gute Bedienung — Reele Preise

Inhaber Georg Rühl II.

MAX MANN

Worfelden bei Groß-Gerau

Telefon Amt Groß-Gerau 53

Manufaktur-, Kurz-, Woll- u. Weiß-
waren, Damen- und Herren-Wäsche
Herren- und Knabenkleidung, Anfertigung
nach Maß, Ganze Brautausstattungen

Saalbau „Zur Sonne“

Besitzer: Jakob Bausch X.

Wettstreitslokal der I. und II. Klasse

Empfehle meine erstklassische Küche, prima
gepflegte Weine lose und in Flaschen.

Jakob Petri, Worfelden

Metzgerei mit elektrischem Betrieb

Prima Fleisch- u. Wurstwaren

zu den billigsten Preisen

Zum Darmstädter Hof

Inh.: Jacob Engel II.

Gut gepflegte Biere und Weine

Prima selbstgekelterten Apfelwein

Anerkannt gute Küche.

Weiter empfehle ich meine Installation in

elektrischen Anlagen aller Art.


Radio und Kraftverstärkeranlagen.

PETER SCHMIDT

WORFELDEN


Brot- und Feinbäckerei

täglich frische Brötchen und feines Gebäck.



500 ccm Opel Motorrad

Alle kaufen jetzt



DAS NEUE



75^{RM}

Lager in:

Opel

Rotor

W.K. C.

Lifag-

Räder

von

60 Mk.

an

Haid & Neu, Gritzner- u. Mundlos-Nähmaschinen
Sprechapparate

Reparaturen gut und billig

Philipp Engel IXX., Worfelden

Neustraße 30.